

寧
經
室
集

二十

孽經室外集卷三

難經集注五卷提要

周秦越人撰越人卽扁鵲事迹具史記本傳明王九思等集注九思字敬夫鄴縣人宏治十才子之一丙辰進士由庶吉士授檢討調吏部主事陞郎中坐劉瑾黨降壽州同知尋勒致仕事迹附明史李夢陽傳餘則未詳難經雖不見于漢藝文志而隋唐志已著錄凡八十一章編次爲十三類理趣深遠非易了然九思因集吳呂廣唐楊元操宋丁德用虞庶楊康侯各家之說彙爲一書以便觀者案宋晁公武讀書志

云德用以楊元操所演甚失大義因改正之經文隱
奧者繪爲圖以明之然則書中畧說殆德用所爲是
編日本人用活字板擺印呂楊各注今皆未見傳本
亦藉此以存矣

脈經十卷提要

西晉王叔和撰宋林億等校定叔和高平人官太醫
令甘伯宗名醫傳稱叔和博通經方精義診處尤好
著述是編從宋嘉定何大任刻本影抄前有宋國子
博士高保衡尚書屯田郎中孫奇光祿卿直秘閣林
億等校上序卷末載熙寧二年及二年進書銜名又

紹聖三年六月國子監雕版札子及各銜名案林億序云臣等博求衆本據經爲斷去取非私又云今考以素問靈樞太素難經甲乙仲景之書并千金方及翼說脈之篇以校之除去重複補其脫漏云云用力可爲勤摯世傳叔和脈訣一卷乃後人依託爲之與此絕不相同也

類編朱氏集驗醫方十五卷提要

宋朱佐撰佐字君輔湘麓人前有咸淳二年眉山蘇景行序是編分風寒諸門采掇議論詳盡曲當凡所載宋氏醫書多不傳之秘笈又皆從當時善本錄出

如小兒病源方論長生九塲氣丸較影抄本爲詳
史載之方二卷提要

宋史載之撰載之字里未詳是編傳本甚希此從北
宋刊本依樣過錄上卷之末附載跋語其文不全宋
史新編作史載之方乃形近之譌施彥執北窗炙輶
錄稱其治蔡元長疾以此得名案所作爲醫總論闡
發甚明各推其因證主治之法精核無遺較諸空談
醫理者固有別焉

書齋夜話四卷提要

宋俞王撰王字王吾吳縣人有周易集說

四庫全書已著錄是編見千頃堂書目傳本殊希書
中辨字音字義以及六經子史莫不考求得失多前
人所未發如云周禮醢人箔菹雁醢謂箔當作落从
艸不从竹一條案經文當作落故鄭司農訓爲水中
魚衣卽說文艸部云落水青衣也後鄭始易落爲𦵹
復又誤爲箔字幾不可解又經傳之文耳卽而已爾
卽如是一條案凡云而已者急言之曰耳古音在第
一部凡云如此者急言之曰爾古音在第十五部如
世說聊復爾耳謂且如此而已是也二字音義絕然
不同而唐宋人至今每每譌錯于古經傳致多難讀

全書援引精確不可殫數固非漫無根柢徒爲臆斷之談者所可及也

遁甲符應經三卷提要

宋楊維德等撰維德附宋史方技韓顯符傳字里未詳顯符稱其能傳渾儀法是編不見于宋志鄭樵通志畧始著錄焦竑經籍志錢遵王述古堂書目所載卷帙並同惟馬端臨通考則作二卷乃傳寫之誤此從舊鈔本依樣過錄卷首有宋仁宗御製序未載永樂間欽天監五官司歷王翼序其書以遁甲論行軍趨避之用如言九天之上九地之下卽孫子形篇所

謂善守者藏于九地之下善攻者動于九天之上亦
卽李筌所云以直符加時于後一所臨官爲九天後
二所臨官爲九地地者靜而利藏天者運而利動與
云其書立術精密考較詳明宜五行之家所不廢也

六壬大占一卷提要

宋祝泌撰泌字子涇德興人以進士授饒州路三司
提幹年老乞休元世祖詔徵不赴事蹟詳江西通志
是編宋志不著錄鄭樵通志畧所列六壬多至八十
二家焦竑經籍志凡八十九家錢遵王述古堂書目
凡一十八家皆無是冊蓋佚已久矣此從宋刻本依

樣影鈔卷首有泌進書序及六壬起例案泌云六壬立名古今不宣其旨惟周禮若族氏掌覆天鳥之巢以方書十日十二辰十二月十二歲二十八星之號卽壬盤之體三代之壬書惟此一證與術家以五行始于水水生于一成于六之說異錄而存之以資參考焉

夷堅甲志二十卷乙志二十卷丙志二十卷丁
志二十卷提要

宋洪邁撰影宋鈔本案夷堅志十集每集二十卷支志十集每集十卷三志十集每集十卷四志甲乙二

集二十卷共四百二十卷小說家唯太平廣記爲卷五百然卷帙雖繁乃搜輯眾書所成者其出于一人之手而卷帙遂有廣記十之七八者唯有此書亦可謂好事之尤者矣邁每集各自爲之序唯四乙未成不及序計序三十一篇篇各出新意趙與時嘗撮各序大指載于賓退錄此本甲志序已佚餘三序存與賓退錄所舉相合每卷之下注明若干事每事亦必注明某人所說以著其非妄書中神怪荒誕之談居其大半然而遺文軼事可資考鏡者亦往往雜出于其間

四庫全書所收者乃支志五十卷與此不相涉此本
卷首有元人沈天祐序稱建學所存舊刻閩本殘闕
承本路府判張紹先之命以浙本補全者邁與兄适
遵皆皓之子名位著述皆相埒世所稱鄱陽三洪是
也邁亦有第二人一景裴名遜一景何不知其名皆
見于此書

策學統宗前編五卷提要

此書標題新刊精選諸儒奧論策學統宗其下列名
心易談巽中叔剛校正存理譚金孫叔金選次桂山
譚正叔孫端訂定三譚皆冠以古雲後學三人姓名

既不經見古雲亦不知其何地書中采輯劉子輩呂祖謙陳傅良楊萬里諸家之文議論堯舜三王伊周孔曾顏孟老韓者共三十三篇爲前集五卷

四庫全書提要載後集八卷續集七卷別集五卷共二十卷而闕其前集今從元板影錄以成完書

斜川集六卷提要

宋蘇過撰案宋史本傳過有斜川集二十卷藝文志則云十卷書錄解題文獻通考卷數與藝文志同其書久已失傳世間行本大率因謝幼槃劉改之二人之名與叔黨同竄改集名聊以欺世据明王世貞弇

州題跋則知以劉集充叔黨之書自元季已然真本
散佚蓋已甚久王士禎香祖筆記記康熙乙酉有書
賈以此集兩冊求售索直二百金惜未之見不知士
禎所述者果屬真本否也乾隆朝仁和吳長元得舊
鈔殘本復從各書纂輯詩文若干其思子臺賦颶風
賦二篇見于本傳者從東坡集校補又益以宋文鑑
播芳大全所選者合之猶可成袞然竟未及鈔入
四庫全書深可惋惜茲從舊鈔本重加繕錄釐定詩
文六卷雖未能盡復舊觀亦庶幾可慰藝林之跂想
矣

增廣箋注簡齋詩集三十卷無注詞一卷提要
宋陳與義撰胡穉箋簡齋集十六卷

四庫全書已著錄此本作三十卷末附詞一卷蓋穉作注時去雜文每卷復釐爲二卷首有樓鑰序併穉自序又穉所編與義年譜及續添詩箋正誤鑰序稱穉約居立學日進不已隨事標注遂以成編貫穿百家出入釋老云云今觀所注多鉤稽事實能得作者本意絕無據拾類書不究出典之弊凡集中所與往還諸人亦一一考其始末固讀與義集者所不廢也

史詠集二卷提要

宋徐鈞撰。鈞字秉國，蘭谿人。與金履祥友善。履祥嘗延致以教授諸子。是編卷首載許謙序。未有張樞黃潛及其子津後序。謙潛並稱鈞取通鑑所載君相事實人爲一詩，總一千五百三十首。此本所存僅三之一。止于唐而不及五季。卽唐以前諸詠逸失已多。然意存勸戒，隱發姦諛之旨，溢于言表。雖殘闕之餘，猶爲藝林所重也。

平安悔稿十二卷提要

宋項安世撰。安世有《周易玩辭》。

四庫全書已著錄。案文淵閣書目曰：字號載丙辰悔。

稿十五冊又月字號載悔稿三冊又一部六冊並殘
缺之本宋史藝文志載丙辰悔稿四十七卷近日傳
本殊希厲鶚宋詩紀事僅從后村詩話方輿勝覽后
村千家詩蒐采數首此則依舊鈔過錄合前後集凡
一千二百八十五首分卷與宋志不合卽后村詩話
所錄春日堤上吹帽臺拋毬糟蟹永州諸作皆未見
于是編卷六以下乃慶元丙辰謫居江陵後所作缺
佚雖多然就存者觀之固紹熙嘉泰間一作者也

雲莊四六餘話一卷提要

宋楊因道撰因道字深仲里居未詳是編藏書家目

錄未見此依宋刊本過錄凡宋人說部中之言四六者若王壺清話容齋隨筆能改齋漫錄文章叢說之類莫不廣搜博採其論四六多以翦裁爲工又云制誥牋表貴乎謹嚴啟疏雜著不妨宏肆持論精審固習駢體者之所必資也

分類唐歌詩殘本十一卷提要

宋趙孟奎編孟奎字文耀宋太祖十一世孫寶祐丙辰文信國榜進士官至祕閣修撰是編元書凡一百卷分門纂類孟奎自序云得一千三百五十三家四萬七百九十一首此本依絳雲樓舊藏過錄僅存天

地山川類五卷草木魚蟲類六卷據毛扆跋稱葉文莊集謂從雷侍講錄殘本完者僅二十七卷公爲英宗朝名臣前此且二百年尙止乎此云云缺佚雖多然全書體例由是可推且唐人隱僻姓氏如毛扆所記文丙詳大諸人亦未嘗不藉是以存也

詩苑叢芳一卷提要

此書影元鈔本首題吳郡梅谿劉瑄伯玉編所選諸家詩潘牥章康黃簡趙汝談方萬里鄭起潛文天祥李迪鄭傅之何宗斗蔣恢朱訖魏近思張榘張紹文張元道呂江蔣華子陳鈞蕭炎沈規呂勝之江朝卿

吳龍起二十四人一人之詩多不過十首少或一二首計僅八十二首每人名著其字號籍貫所選之詩近體較多率皆清麗可誦蓋江湖小集之流亞而決擇精當似取法于唐人之選唐詩也

南海百詠一卷提要

宋方信孺撰信孺字孚若莆田人以蔭補官開禧中假朝奉郎使金三往返厯淮東轉運判官知真州至廣西漕所著有好菴游戲詩境集未見是編乃其官番禺漫尉時所作取南海古蹟每一事爲七言絕句一首每題之下各詞其顛末注中多記五代南漢劉

氏事所引沈懷遠南越志鄭熊番禺雜志近多不傳
厲鶚宋詩紀事載劉后邨序信孺詩文云宮羽協諧
經緯麗密于此亦足見其一斑矣

聲律關鍵八卷提要

宋鄭起潛撰起潛字子升吳縣人少孤力學舉進士
官至直學士權兵部尙書是編乃其官吉州州學教
授時所上前有淳祐元年正月六日尙書省劄子云
總以五訣分爲八韻至于一句亦各有法是雖專爲
場屋而設錄而存之以見當時學者之所業矣

觀瀾集注三十卷提要

宋林之奇編呂祖謙集注之奇有尙書全解祖謙有
古周易

四庫全書並已著錄是編宋史藝文志著錄六十三
卷此從宋本依樣影鈔僅及其半甲集凡二十五卷
自屈平以下六十五人乙集五卷自揚雄以下凡十
九人分類編輯祖謙集注多本舊注爲之如離騷經
文賦閑居賦卽用五臣注釋捃拾精核足與之奇書
相輔而行也

梅磄詩話三卷提要

宋韋居安撰居安吳興人景定間進士是編黃虞稷

千頃堂書目錢遵王讀書敏求記並著錄所論多南宋時人之作名篇警句往往在是采掇亦復謹嚴卷末云余丙子歲司糾三衢二月十一宋太后詔諭諸郡歸附郡將而下奉詔依應吏民安堵如故云云是居安以宋臣而入于元者也

樵歌三卷提要

宋朱敦儒撰敦儒字希真洛陽人紹興乙卯以薦起賜進士出身爲祕書省正字兼兵部郎官遷兩浙東路提點刑獄上疏乞歸居嘉禾此依毛晉汲古閣舊鈔過錄案花菴詞客稱敦儒東都名士天資曠逸有

神仙風致江西月二首可以警世之役役于非望之
福者是編江西月凡八卽指第五第六二首而言又
張正夫稱敦儒月詞插天翠柳被何人推上一輪明
月詞意絕奇似不食烟火人語是作今載集中餘皆
音律諧緩情至文生宜其獨步一時也

陽春白雪八卷外集一卷提要

宋趙聞禮編聞禮字立之臨濮人案文淵閣書目月
字號載陽春白雪一冊乃闕佚之本此從舊鈔依樣
倣寫所選凡二百餘家宋代不傳之作多萃于是去
取亦復謹嚴絕無猥濫之習聞禮著有釣月軒詞周

密絕妙好詞嘗采其作是編亦自錄一二如王漏遲
法曲獻仙音瑞鶴仙等闋字鍊句琢非專以柔媚爲
工者可比也

王周士詞一卷提要

宋王以凝撰以凝字周士湘潭人由太學生仕鼎澧
帥幕靖康初徵天下兵以凝走鼎州乞解太原圍建
炎中以宣撫司參謀制置襄鄧是編依毛晉汲古閣
書鈔過錄凡三十一首以凝詞句法精壯如和虞彥
恭寄錢遜升薦山溪一闋重午登霞樓滿庭芳一闋
艤舟洪江步下浣溪沙一闋絕無南宋浮艷虛薄之

習其他作亦多類是也

詞源二卷提要

宋張炎撰炎有山中白雲詞

四庫全書已著錄是編依元人舊鈔影寫上卷詳論五音十二律律呂相生以及宮調管色諸事釐析精允間系以箇與姜白石歌詞九歌琴曲所記用字紀聲之法大畧相同下卷厯論制曲句法字面虛字清空意趣用事詠物節序賦情離情令曲雜論五要十四篇並足以考見宋代樂府之制自明陳仲醇改竄爻書刊入續祕笈中而又襲用沈伯時樂府指迷之

名遂失其真微此幾無以辨其非蓋前明著錄之家
自陶九成說郛廣錄僞書自後多踵其弊也

新增詞林要韻一卷提要

此書不分卷不知撰人姓名目錄標題新增詞林要
韻書中標題則曰詞林韻釋其書分一東紅二邦陽
三支時四齊微五車夫六皆來七眞文八寒閒九鸞
端十先元十一簫韶十二和何十三嘉華十四車邪
十五清明十六幽游十七金音十八南三十九占爻
共十九部而以上去二部依部列于平聲之後而入
聲不獨爲部凡入聲之作平聲作上聲作去聲者又

各依類分隸于平上去之後要皆統于平聲十九部
之內其中每字皆有訓釋一字數意備載無遺而詞
句簡妙精而不支書縫有菉斐軒三字近人厲鶚論
詞絕句云欲呼南渡諸公起詞韻重雕菉斐軒世人
知重此書實自鶚詩始發之然自來作長短句者未
嘗不以入聲押韻而此以入聲分隸平上去三聲蓋
後來曲韻之嚆矢或以曲盛于元而此書實出于南
宋爲疑今案書錄解題歌詞類有五十大曲十六卷
萬曲類編十卷則宋時未始無曲也此影宋鈔錄卷
端標題詞林詞林者猶藝林之謂非必指長短句而

言以此爲詞韻殆鴟誤會詞林二字之義耳

陳氏小兒病源方論四卷提要

金陳文中撰文中字文秀宿州符離人官太常明大小方脈于小兒瘡疹尤造其妙金亡歸宋處連水十五年詳鄭全序案醫科一十有三小兒爲啞科其治尤難是編分養子真訣小兒變蒸候又形證門及面部形訣皆先論後方鄭全云是書訣其形狀別其證候跡其方論釐爲一卷今作四卷疑後人所分故書中有稱陳氏云者考諸家目錄所載宋代小兒方症各書今多不傳此本依宋刻影寫亦僅存之祕笈也

歷代蒙求一卷提要

元王芮撰按錢曾讀書敏求記稱歷代蒙求一卷汝南王芮所編括蒼鄭振孫復爲纂注書中歷叙帝王古今世代文約事該不繁不紊鄭注又復援經據史貫徹古今較之周興嗣千文以字集而或乖其義補注蒙求以事對而多失其序者其啓迪童蒙之功似更爲過之矣此卷刻于元至順中馬速忽守新安以其書有資啓發令郡教授王萱鋟梓以廣其傳此從錢曾所藏本影寫尚是元時舊刻也

論語叢說三卷提要

元許謙撰伏讀

四庫全書總目云元史許謙本傳載謙讀四書章句集注有叢說二十卷此本凡大學一卷中庸一卷孟子二卷中庸闕其半論語則已全闕是編從元人刻本依樣影抄其中有正文而誤似注者如中卷晝寢章衣敝章下卷侍坐章驥章爲邦章性相近章荷蓀章乃元代刻書陋習悉仍其舊案謙受業于金履祥故書中引履祥之說獨稱先生吳師道云欲讀朱子之書必由許君之說今考是書發明朱子之學旁引曲證不苟異亦不苟同泰伯章云王文憲謂集注朱

卷三
子因舊傳修入未及改美王章云沾去聲訓賣若平聲則訓買于此義不相合川上章云舍去聲止息也見楚辭辨證集注未及改割不正不食節則云古者燕饗有大變曰裁又云其餘牲體骨脊及腸胃肺心割截各有一定所謂不正則不合乎度者頗有根據皆足以資考證也

讀中庸叢說二卷提要

元許謙撰案元史本傳謙讀四書章句集注有叢說二十卷朱彝尊經義攷據一齋書目收入總經類注云未見通志堂經解亦未及編刻蓋世已久不見其

書矣今

四庫全書所收祇大學一卷中庸一卷孟子二卷而已中庸本二卷已佚其半論語則已全佚今除論語叢說三卷已從元板影錄進

呈外復從吳中藏書家得元板中庸叢說足本二卷又影錄副本以補前收之所未備而許氏之書遂成完璧案黃潛爲謙作墓誌載此書卷數二十與本傳相符合今所錄者俱遵元板論語三卷中庸二卷合之大學一卷孟子二卷得八卷皆首尾完整明祕閣書目所載四書叢說亦止四冊殆與今本相同蓋未可

據墓誌本傳而疑其尙有闕佚也

續古篆韻六卷提要

元吾衍編有周秦石刻釋首一卷

四庫全書已著錄是編從舊鈔本依樣影寫衍以石鼓文詛楚文比干盤泰山繹山等刻依韻分纂卽遇無字之韻亦接書之非有闕佚蓋畱以待補疑爲未成之本故藏書家目錄多未采入末卷辨疑字專爲鄭樵薛尚功兩家石鼓音義而作如云第十鼓中一字薛作獻鄭作狩衍則云當作獸意通案周官庖人賓客之禽獸注云獻古文爲獸是也錄而存之于小

學不無所助焉

皇元征緬錄一卷提要

不著撰人名氏卷首撮舉大綱有臣作政典云云蓋卽撰元口政典章者政典中稱英宗爲今上皇帝是編似亦成于至治之初體例謹嚴非若政典之漫無端緒不足以資考證所載征緬事多與元史緬國傳相同自大德二年以下更足補正史所未備蓋明時修史卽用此爲藍本錄而存之以備參考焉

元祕史十五卷提要

不著撰人名氏其紀年以鼠兒兔兒羊兒等不以支

于蓋卽國人所錄明黃虞稷千頃堂書目著錄十二
卷明文淵閣書目字字號云元祕史一部五冊又一
部同又云祕史續稿一部一冊又一部同並闕佚之
本此依舊鈔影寫國語旁譯記元太祖太宗兩朝事
迹最爲詳備案明初宋濂等修撰元史急于歲事載
籍雖存無暇稽求如是編所載元初世系李端义兒
之前尙有一十一世太祖本紀述其先世僅從李端
义兒始諸如此類并足補正史之紕漏雖詞語俚鄙
未經修飾然有資考證亦讀史者所不廢也

羣書通要七十三卷提要

不著撰人姓氏是編藏書家未著錄此依元至正間
重刊本影寫前有大德己亥王淵濟序稱蒙翁因嘿
齋于君所輯之本旁搜博采增至數十卷凡詩家之
一字一意悉羅致之視初本殆將十倍命其子彌高
壽梓云云所謂蒙翁嘿齋未詳其人其書自甲集天
文至庚集譬喻凡三十七門每十卷爲一集招摭經
傳子史及前人詩文中成語分類排纂頗藉以有考
視明人類書餒食碑販者大相徑庭辛壬癸三集卽
元混一方輿勝覽疑重刊時所增故淵濟序中未及
其書且有至元戊寅葛節梅軒蔡氏刊行箇記詹事

卷三
錢大昕云勝覽于澤州無陵川縣解州無芮城縣而書中又有冀寧之名係大德中所改則書成之後別有竄易皆書肆射利者爲之而不知其牴牾也

遊志續編二卷提要

元陶宗儀撰宗儀有國風尊經

四庫全書已著錄是編繼宋陳仁玉遊志而作所載多唐宋元人遊覽之作自樊宗師柳公權元結而下凡四十有八家選擇精審並足以資考證書中有存其目而其書未經採入者若李格非之洛陽名園記范至能之驂鷺錄吳船錄後人遂疑爲未成之書案

朱彝尊云宗儀所著各書有裨史學此其一也

王山璞稿二卷提要

元顧瑛撰瑛字仲瑛崑山人事蹟附元史陶宗儀傳
後王山璞稿

四庫全書已著錄一卷是編乃至正壬辰乙未間所作凡古今體詩二百七十五首詞一首書中送董參政餽歌十章如克淮西入昌化定安吉諸題足補史所未備元史惟稱秋七月饒徽賊犯昱嶺關及杭州路案是時董搏霄率兵復之所云參政及送周天蟾詩中大參董侯皆其人卷末有云水戰甚難蓋舟櫓

有遲速風水有逆順故不能齊其隊伍然則瑛于舟
師之法亦畧窺其一二非僅以詞語流麗見長也

桐江集八卷提要

元方回撰回桐江續集

四庫全書已著錄皆其元時罷官後所作其前集名
虛谷集見黃虞稷千頃堂書目疑卽是編案周密極
譏回爲人之鄙全無品行伏讀

四庫全書提要云集中諸文居然醇儒之言就文言
文要不可謂其悖于理也如賈似道魯港喪師之後
眾皆慮其復入回上書數其十罪繼又言似道與其

客廖瑩中皆當卽誅又請罷王爚平章以佚其老見集中前後上書本末並確有所見中外快之卽他文亦多有根據固宋末元初一作家也

王微士詩集八卷提要

元王沂撰沂字子與泰和人博通經史學者稱爲竹亭先生至正間嘗試子有司不偶遂不復出洪武初徵爲諸說書授福建鹽運司副使以老辭歸不赴是編乃其門人蕭翬所編梁潛稱沂與大梁辛好禮楊伯謙上元周伯寧清江彭聲之豫章萬德躬倡詩道于東南期以關世教爲務今案沂詩于古體多冲淡

瑩潔近體則典雅鏗鏘宜其凌跨一時矣

松雨軒詩集八卷提要

元平顯撰顯字仲微錢塘人明洪武初官廣西藤縣
令案顯集初刻于滇南是編乃其裔孫所重刊今依
樣過錄逞序稱其足跡半天下有似于子長學博而
行峻直道而屈身云云今觀其詩及風土之同異道
途之阨塞以及友朋之離合悉見于篇蓋得于遠遊
之助爲多耳

蟻術詩選八卷提要

元邵亨貞撰亨貞字復孺有野處編四卷見

四庫全書伏讀

四庫全書總目云亨貞所著蟻術詩選世已無傳此從舊鈔依樣過錄凡古今體三百七十六首又聯句三首詩格高雅絕無元世綺縟之習案馮遷汪稷跋野處編並云其書乃上海陸鄰以授稷而刊行是編及詞選每卷首皆有新都汪稷校字樣是亦鄰所授刊之冊跋又云并所著蟻術詩選蟻術詞選爲十六卷今合三書卷帙觀之並屬完善之書惟卷首不著名而著字乃明人刻書陋習也

名儒草堂詩餘三卷提要

元盧陵鳳林書院輯本未詳選者姓氏自劉藏春以下凡六十家皆南宋遺老選錄精允秀句清言多萃于是而黍離之感有不能忘情者厲鶚跋稱弁陽老人絕妙好詞而外鮮焉寡匹余于此二種心所愛玩無時離手云案千頃堂書目始著錄一名續草堂詩餘即是編也

蟻術詞選四卷提要

元邵亨貞撰亨貞有野處集見

四庫全書伏讀

四庫全書總目云亨貞所著蟻術詞選世已無傳又

云其詞世不多見惟陶宗儀輟耕錄載所作沁園春
二首雋永清麗頗有可觀蓋所長尤在于是惜詞選
今已久佚矣是編從舊鈔依樣影寫藏書家未見著
錄古今詞話亦稱其沁園春詞新艷入情書中追和
趙孟頫十首案侯文燦所輯松雪詞已佚其點絳脣
一闋感皇恩一闋蝶戀花一闋未嘗不藉是以見其
梗概也

名家詞十卷提要

國朝侯文燦編輯所選爲南唐二主詞馮延巳陽春
集宋則張先子野詞賀鑄東山詞葛劖信齋詞吳敬

竹洲詞趙以夫虛齋樂府元則趙孟頫松雪詞薩都
刺天錫詞張野古山樂府文燦自序云古詞專集自
汲古閣六十家宋詞外見者絕少又稱孫星遠有唐
宋以來百家詞鈔本訪之僅存數種合之笥中所藏
共得四十餘家茲先集十家付之梓人云云是編子
野詞

四庫全書已著錄卽陸安集伏讀

四庫全書總目云此本近時安邑葛鳴陽所輯凡詞
六十八首此則一百三十首較爲完善末附東坡題
跋其餘所選亦簡擇不苟要不失爲善本也

止

摯經室外集卷四

五服圖解一卷提要

元龔端禮撰端禮字仁夫嘉興人此書載絳雲樓及述古堂書目朱彝尊經義考則云未見端禮祖名頤正宋時宣教郎充樞密院編修官常著服圖端禮是學淵源有自又復精勤叅考越十載而後成書嘉興路牒偁其有裨世教厚風俗淳不誣矣其例以五服列五門每門立男女已未成人之科分正加降義四等之服劃圖分章展卷釐然頗足爲參考禮制之助當元泰定元年嘉興路呈此書於江浙行省移咨中

書省此從至治間刊本影寫錢曾讀書敏求記云端
禮以布衣上書闕下蓋有心世道之士也

律文十二卷音義一卷提要

是編不著撰人名氏音義宋孫奭等撰奭字宗古博
平人有孟子音義

四庫全書已著錄事蹟詳宋史本傳宋史刑法志云
宋法制因乎唐律令格式則隨時增損之此書見藝
文志其中所載自名例以至斷獄凡十二門與唐志
悉合陳振孫書錄解題亦云律文十二卷自魏李悝
漢蕭何以來更三國六朝以至隋唐因革損益備矣

本朝天聖中孫奭等又撰音義歷代異名沿革皆著之按奭所著音義爲唐律而作于治字下云唐避高宗諱爲理期字下云唐避元宗諱爲周今改從舊又於名例杖字下云皇朝建隆四年始有折杖之制流字下云皇朝建隆四年制犯徒者加杖免役此則宋時所增並不見于律文故加皇朝以別之至書中字體翻切皆有補于小學卷末列孫奭馮元宋祁等銜及天聖七年四月日准勅送崇文院雕造十五字據此則爲北宋所刊無疑矣

莆陽比事七卷提要

宋李俊甫撰俊甫字幼傑莆田人是編見宋史藝文志成于宋嘉定間取唐以來上下千百年間凡莆陽事之可傳者綺分璧合釐爲七卷名曰比事其同邑人陳謙有序林琢有跋此則從明人林兆珂宋本翻刻影抄莆陽宋人舊志如鄭僑莆陽人物志以及趙彥勵陸爻所著莆陽志今多散失俊甫此編時見採錄且屬辭有法紀事覈真可與汝南先賢傳襄陽耆舊志並傳也

黃帝陰符經疏三卷提要

唐李荃譏按荃所著太白陰經八卷

四庫全書已著錄此書載宋崇文書目館閣書目通志通攷及陳振孫書錄解題晁公武讀書志皆作經注一卷惟宋史藝文志作經疏一卷此本篇帙無多分爲三卷已非荃之舊次上卷演道章載神仙抱一之道中卷演法章載富國安人之法下卷演術章載強兵戰勝之術與道藏本分目相符

中藏經三卷提要

漢華陀撰分上中下三卷隋書經籍志載華陀方十卷唐宋藝文志並載華陀藥方一卷鄭樵通志藝文略同宋志又載黃氏中藏經一卷注云靈寶洞探微

撰與此別爲一書無疑矣是編今吳中有趙孟頫手寫本分上中下三卷隋志列有華陀觀形察色并三部脈經蓋卽是書之中卷也其書文義古奧似是六朝人手筆非後世所能假托

王函經一卷提要

唐杜光庭撰光庭字聖賓括蒼人王建據蜀除諫議大夫進戶部侍郎歸老青城山此書銜偁特進檢校太傅太子賓客主管徽國公殆建時加授也書中辭簡義深黎民壽注亦多發明是書藏書家皆未著錄錢曾讀書敏求記載有光庭了證歌一卷又與此異

惟明人殷仲春醫藏目錄曾載是冊列之無上函中
此從宋刻影寫

三水小牘二卷提要

唐皇甫枚撰枚字尊美安定人唐咸通末爲汝州魯山令僖宗之在梁州枚赴調行在此其書中可考者也是書成於天佑四年枚當旅食汾晉而追紀咸通時事共得上下兩卷明嘉靖時姚咨曾手鈔之此從錢曾述古堂藏本影寫書中所載雖涉神仙靈異之事而筆雅詞明實寓垂戒又案天佑庚午時晉猶稱天佑而枚亦稱之

王堂類藁二十卷西垣類藁二卷提要

宋崔敦詩撰敦詩字大雅本河北人南渡後遂居溧陽登紹興進士官至中書舍人李心傳朝野雜記謂呂祖謙文鑑既成近臣密啓其失因命直院崔大雅更定增損去畱凡數十篇朱子語類亦云祖謙編錄文鑑有敦詩刪定之語敦詩淳熙九年致仕故字文介所作告中偁其才猷敏贍問學淵深是編所載宋孝宗時制誥口宣批答青詞甚詳諸家書目皆未著錄而宋史藝文志誤爲周必大所撰明葉盛菉竹堂書目曾列其書是明中葉尙有傳本此爲活字板其

文皆必大集中所未有也

周易經疑三卷提要

元涂潛生撰按江西通志潛生字自昭宜黃人邃於易爲贑州濂溪書院山長著有四書斷疑易義矜式行世朱彝尊經義攷載潛生易主義一卷注稱已佚並引楊士奇言曰易主義一卷元臨川鄉貢進士涂潛生著專爲科舉設此書題曰經疑元以經疑取士蓋擬之而作也此書或卽主義或卽易義矜式不可得而考矣

詩說十二卷提要

宋劉克撰克信安人事蹟未詳朱彝尊經義攷云此書宋藝文志焦氏經籍志朱氏授經圖均未之載崑山徐氏傳是樓有藏本乃宋時雕刻前有總說惜第二第九第十卷都闕此爲影宋抄本闕卷皆對卽從徐氏藏本錄出者前有克自序作於紹定壬辰壬辰宋理宗紹定五年克乃理宗時人也宋儒說詩有攻小序者有守舊說者廢小序者朱子也尊古注者呂祖謙也克之學出於祖謙其子坦跋稱其書每篇條諸家之解而繫已意於後其所纂輯家數視東萊詩記加詳克之學本之呂氏從可知矣體例雖與詩記

相同然互有去取亦不盡從祖謙之說也坦以纂輯
各家卷帙繁富未易鋟梓乃盡刪舊解獨存克說則
是書非克之原本矣鄭風大叔于田今本脫大字此
書與唐石經注疏本同亦可證近世坊本之誤

書經補遺五卷提要

元呂宗傑輯事蹟未詳其自序云在錢唐購得唐太
宗御製王右軍執筆圖乃東陽陳及時父希元先生
授同里趙文淑之家藏者遂輯成此書卷中有陳及
時跋稱其先人諱夢魁字希元登咸淳甲戌進士科
大德末典教嵊庠則希元亦元時人矣第一卷爲執

筆圖第二卷法書本象國子助教汝上陳繹曾著第三卷書法總論第四第五卷博古體篆釋乃宗傑自著之書采輯張懷瓘書斷諸書中如大梵王字各體書頗爲詳贍亦臨池家之一助也

漢唐事箋十二卷後集八卷提要

元朱禮撰禮之事蹟無可攷其書論漢唐政典凡食貨職官禮樂兵刑穿穴三書參稽六典爲寔是之學無蕪蔓之辭論二漢之事往往有微言精義可補顏李二家注義之所未及者至于李唐典制但取新書不取舊書蓋新書紀傳不及舊書之詳表志則新書

詳贍舊書太略禮專論大經大法以表志爲則非不用舊書也禮持議平允措詞爾雅無繁冗簡陋之弊學識在鄭樵之上其論太初算術謂司馬遷與鄧平同定其法當時以爲最密而史記反去太初日分之術而用古法九日四十分據漢書太初術建星進退于牽牛之度知太初術疎而不密故史遷有意不用其法而淳于陵渠日月如合璧五星如連珠之說爲附下罔上儒生讀史漢者皆習焉不察而禮能詳言之可稱發前人之所未發矣

昆山郡志六卷提要

元楊諒撰按諒字履祥自號東溪老人事蹟無攷前有至正四年楊維禎序云與諒同出文公則諒乃閩人流寓於王峰者崑山本縣治元成宗元貞二年升爲州故此書有郡志之名延祐中移州治於太倉故志中有新治舊治之別書法簡要得體可與王峰志並傳惟鐵崖序稱二十二卷今據書止六卷首尾完具豈成書之後重爲刪定耶

羣書類編故事二十四卷提要

元王鑒撰按鑒姓名見寧波府志明初曾任廣東肇慶太守事迹無考其書明史藝文志及藏書家皆未

著錄此本從明莫雲卿家藏元刻影寫其書類分十八門所采故事史傳之外多取唐宋說部大旨仿朱勝非五色線之體亦類書中之一格也

釣磯文集五卷提要

唐徐寅撰按寅字昭夢莆田人乾寧初進士釋褐授秘書省正字

四庫全書採徐正字詩賦二卷恭繹

欽定提要云寅著有探龍釣磯二卷共五卷自唐藝文志已不著錄意當時卽散失不傳此本僅存賦一卷計八首各體詩一卷計三百六十八首蓋其後裔

從唐音統籤文苑英華諸書裒集成編附刻家乘之後者已非五卷之舊矣此爲錢遵王所藏影宋本據其族孫師仁序云家故有賦五卷採龍集五卷又於蔡君謨家得雅道機要訪得詩二百五十餘首以類相從爲八卷并藏焉宋史藝文志載徐寅別集五卷疑卽師仁所藏之五卷也今本乃其裔孫玩所編次賦五卷凡五十首

四庫全書所錄八首皆在其中而全唐文未採者較多二十一首云

毅齋別錄一卷提要

不著撰人名氏卷端有正德辛未十一世孫興序一
首云先世文清公號毅齋嘗從東萊晦菴相與倡學
於婺其所著有讀易記讀詩記詠文集等書以之格
君心淑後學羽翼吾道有補於世教也尙矣云云考
之宋史乃徐僑之詩也僑字崇甫婺州義烏人早從
學於呂祖謙門人葉邦淳熙十四年舉進士調上饒
主簿始登朱熹之門熹稱其明白剛直命以毅名齋
端平中官至工部侍郎以寶謨閣待制奉祠卒謚文
清僑之學以真踐寔履爲尙奏對之言剖析理欲因
致勸懲宏益爲多乃理宗時之名臣不以詩名然無

講學家習氣頗近江湖詩派興序又云有文集一十
卷遭回祿煨燼今世無傳本矣

編類運使復齋郭公敏行錄提要

無卷次無撰人名氏前有古候黃文仲及三山林興
祖兩序疑出二人所編按郁有言行錄一卷已鈔錄
此特其宦游所至與當日賢士大夫一時投贈之作
江西饒州府志稱郁知浮梁縣聘吳仲迂爲後進師
士風不變政爲江南諸邑最集中壽老致政嘉議郭
公序乃胡長孺汲仲作按鄭元祐遂昌雜錄言汲仲
爲金華三胡先生之一罷官後客杭貧甚以古文倡

人求記碣序贊稍不順理雖百金不作也又陶宗儀
輟耕錄載汲仲特立獨行剛介有守趙松雪嘗爲羅
司徒奉鈔百錠爲先生潤筆請作乃父墓銘先生怒
曰我豈爲宦官作墓銘邪是日先生正絕糧其子以
情白坐上諸客咸勸受之先生卻愈堅汲仲耿介絕
俗而乃肯爲郁父作序可以知郁之爲政矣饒州府
志又言郁爲浮梁時風謠云桃李陰陰六萬家下車
民不識州衙甘棠喜有千年政美玉終無一點瑕今
集中有民謠十首而昌江百詠祇存四十五首不錄
此詩當日之流風善政遺佚不少且一時之士與郁

相贈答者如仇遠汪澤民鄧文原皆不輕與人周旋
者則郁之賢益可知矣

元賦青雲梯三卷提要

無編纂姓氏從元人墨跡影寫上卷錄賦三十六篇
中卷錄賦三十九篇下卷錄賦三十六篇凡一百十
一篇蓋當時應試之士選錄以作程式者其中黃潛
太極圖賦羅曾石鼓賦孟泌凌煙閣賦鄭選金馬門
賦蒲紹簡登瀛洲賦莊文昭蒲輪車賦高明大成樂
賦謝一魯孔滄范琮荆山璞賦尹貫道靈臺賦祝堯
手植檜賦歐陽元陳泰天馬賦邵公任暘谷賦彭士

奇泰堦六符賦周鏗大別山賦沈幹浙江賦曾煒王燭賦方回孫無逸圖賦方君王龍虎榜賦劉性石渠閣賦王沂辟雍賦等二十三篇已載

欽定賦彙中其未采者尙八十餘篇又賦彙載曹師孔靈臺賦逸句此有全文皆可補其闕也

隸韻十卷提要

宋劉球撰按宋洪适篤嗜隸古取兩漢以來碑銘遺經殘石鐙鉦盆鏡之屬綜括卷軸佐證經傳次其時代先後成書五種如隸釋隸續隸纂隸圖隸韻是也今世所傳惟隸釋隸續二書他皆未見盤洲集中僅

聖經堂外集
卷四
有隸韻序一篇疑洪氏當日尙未成書其後婁機撰
漢隸字原悉依隸釋原次蓋以補洪氏之缺也今球
此書凡十卷載入宋史藝文志首存殘本碑目一卷
及劉球進表半篇第十卷末行又有御前應奉沈亨
刊七字董其昌定爲德壽殿本似未真確然此爲當
日奏進後奉刊之本無可疑者書中如孔宙碑以畝
作敏王純碑以糜作麇苟君碑陰以友作支校官碑
以界作卑唐扶頌以牽作掌郁閣頌婁壽碑以愛作
舜皆其采錄時之失碑目所引諸碑凡二百六十
種存於今者不及四分之一則球當日採獲之勤編

次之多闡洪氏之緒餘導字原之先路爲功亦匪淺也

編年通載四卷提要

宋章衡撰按陳直齋書錄解題晁公武郡齋讀書志皆載此書凡十五卷此宋刊本四卷前有明內府文淵閣印記考之明內閣藏書目錄云編年通載二冊不全宋元祐間起居舍人章衡撰進斷自帝堯訖於宋治平丁未總三千四百年推甲子以冠其首凡史之訛謬疑誤皆爲辨證世數代易歷統相傳年名國號灾祥善惡具載焉凡十卷其第五卷以下皆闕據

此則爲明內府所藏宋本無疑也首有元祐三年章
粢刊書序一篇粢乃衡之族父又衡進書表一篇自
一卷帝堯起至四卷西晉世祖太康元年止厯代興
亡分合開卷瞭如是誠有裨於史學也

廣黃帝本行記一卷提要

唐王瓘撰系銜稱閩州晉安縣主簿王瓘進考之新
唐書藝文志雜傳記云王瓘廣軒轅本紀三卷蓋卽
此書此卷首題修行道德四字必每卷各以四字標
識本書帝吹律定姓者十二注云在中卷又黃帝有
子各封一國注云具中卷可證此爲下卷佚去上中

二卷矣此從錢曾舊鈔藏本影寫恐世間更無足本
讀書敏求中具載之

淳祐臨安志六卷提要

宋施諤撰按兩浙古志北宋圖經久已無考至南宋
建爲行都其志乘傳於今者則有周淙乾道志潛說
友咸淳志二種已經

四庫全書采錄此志從宋刻殘本影寫僅存五卷至
十卷無序目可稽觀書中敘錄皆至淳祐間府尹趙
與憲而止其爲施諤所撰淳祐志無疑所存惟城府
山川二門前有總論一篇異於他志其敘城府一首

城社次官宇次舊治古蹟次今治續建爲第五卷
府二首學校次樓觀次園館次廂隅次軍營爲第六
卷城府三首坊巷次界分次橋梁次倉場庫務次館
驛爲第七卷叙山川一首城內諸山次城南諸山次
城西諸山次亭館次古跡爲第八卷山川二首城東
諸山次城內外諸嶺次諸洞次諸石次諸塢次峪衙
關爲第九卷山川三首江次湖次河渠次水閘爲第
十卷諸門皆爲咸淳志所本而各條下引載前賢題
咏詩文則互有詳畧此與乾道咸淳二志備載南宋
數朝掌故藉補史傳之遺皆未可以殘缺廢也

賢良進卷四卷提要

宋寶文閣學士龍泉葉適撰按適有水心文集二十
九卷

四庫全書已著錄宋人賢良進卷甚多如孫深賢良
進卷十卷錢公輔賢良進卷十卷均載郡齋讀書志
而適書獨不存唯前明葉盛菉竹堂書目經濟門有
葉正則賢良進卷二冊卽此書也萬曆溫州府志載
水心文集之外有制科進卷九卷外稿六卷疑此與
外稿實係一種故黃震讀文集日抄于適正集外復
著水心外集其篇目摘要與此卷脗合按宋史孝宗

本紀淳熙十一年六月詔在內尙書侍郎兩省諫議
大夫以上御史中丞學士待制在外守臣監司不限
科舉年分各舉賢良方正能直言極諫一人適此卷
卽于其時所進蓋適抱匡時之用故初年輪對卽以
經世之說進且觀其上西府書及執政薦士書所舉
陳傅良以下三十四人如劉清之陸九淵章穎呂祖
謙楊簡項安世皆一時賢傑洵屬有心當世之士卽
以文體而論亦筆力橫肆足以振刷浮靡唯持論間
有不純如陳振孫譏其所作習學記言厯詆百家而
篤信子華子推崇之以爲真黃震亦辨其行官田不

能無害則躋駁處正復不免故朱子亦嘗移書與之辨論文體至日抄推尊別集以爲論治之書極論天下之勢牽縮而不可爲開闔數萬言蓋能言之士莫能尙也

四元玉鑑三卷提要

元朱世傑撰按世傑字漢卿號松庭寓居燕山不知何處人其書未載前人著錄總二十四門凡二百八十八問具開方寔方廉隅之數漢卿于九章旣熟于天元一術正負開方之法又神而明之是誠算學一大家也其芟草形段如像招數果積疊藏各問爲自

來算書所未及此從舊抄本影寫前有大德癸卯臨
川前進士莫若序卷末又有大德登科二月甲子納
心齋祖頤季賢父序稱世傑嘗游廣陵學者雲集編
集算學啓蒙與此先後付刊並行于世今啓蒙一書
不可復見矣

運使復齋郭公言行錄一卷提要

元福州路儒學教授徐東撰按饒州府名宦志郭郁
字文卿大梁人皇慶末以江浙省都事來知浮梁縣
善爲鈞距自方趙廣漢官終福建都轉運使又浙江
通志名宦類引至正四明續志云郭郁泰定二年任

明州路總管有才略在郡正賦籍定役法措置食鹽
綜理倉庫皆有法修孔子廟飭弟子員徵逋租損浮
費至學廩不能容如兩志所書則郁之宦蹟有足多
也是錄因東適同官故悉載其所歷任途由江南江
西浙江福建諸處所在立政立事愛士愛民勸善懲
惡興利除害各善政後復附以建安進士張復題詞
及福建學陳御史臺狀牒文等件以見當日人情愛
戴之誠各家書目均不著錄唯錢大昕補元史藝文
志曾採入史部傳紀類今錄之雖不盡可據但亦有
可備史家之事寔者

圖解素問要旨論八卷提要

金劉守真撰馬重素重編按守真名完素事蹟見金史方技傳所著素問元機原病式一卷宣明論方十五卷傷寒直格方三卷傷寒標本心法類萃二卷等書皆爲

四庫全書所載此從金板影寫錢大昕元史藝文志補載素問要旨八卷卽此書也其自序以爲內經元機奧妙旨趣幽深習者苦無所悟乃撮其樞要集成斯文以分三卷叙爲九篇繪圖釋音以彰明之其徒馬重素又爲之序重爲編定分作八卷云

元風雅三十卷提要

元蔣易撰按易字師文建陽人焦竑經籍志及黃虞稷千頃堂書目所著錄卷數皆同

四庫全書載元風雅有傳習及孫存吾所編前後二十四卷易與傅孫同時故兩書皆爲道園虞集所序集序傅書在至元二年丙子孫書謝升孫序亦同此書在至元五年己卯後于傅孫之書幾三年不知道園序何以並不論及傅孫兩家也書首取劉因與傅選合而壓卷亦取黃金臺一篇宜乎後世汲古之家或疑與傅選同科而略其傳述歟今計劉因以下至

二十七卷止凡八十五家人不逮傅孫兩家之半而甄錄之詩幾倍之故傅孫於諸大家所錄寥寥此則選擇古體較爲詳審卽同錄一人一題之詩題目字句各不相侔如胡汲仲題女直驄馬圖孫本題字下多崔錄事三字虞集李伯時九歌圖傅本無李伯時三字送星上人歸湘中傅本無歸湘中三字柳貫和袁集賢上都雜詩傅本和字上有同楊仲宏應舉六字諸如此類不可勝舉其餘字句如揭傒斯送淳直子朝發扶桑國傅改扶桑作梁宋吳師道黃金臺千里風塵馳駿馬孫改風塵作強燕銅雀臺漢家一片

當時土孫改當時作如膏蓋當日隨抄所得而又出于各人點竄不可拘于一律至于每人篇尾各著事寔此則較傅孫兩家爲勝存之足以資考證之助末三卷分雜編亦與彼選體例略同錢大昕著元史藝文志旣載易著而復載元風雅八卷注云無撰人名或云宋襄至于傅孫兩家所撰別爲元詩前後集不知何所據也

掣經室外集卷五

東臯詩集五卷提要

元馬王麟撰按王麟吳陵樊川人仕元官叅知政事
著有詩集五卷嘗自號東臯道人故名其稿曰東臯
漫稿云此編成于元至正間當時周伯琦王宗堯皆
爲之序王麟當元之末季仕宦顯要乃能耽工吟咏
時出清言且又惕事感時借抒經濟今閱其古今體
詩率皆婉麗暢達可謂有關於名教有裨于諷諫者
矣卷末附錄東臯先生傳一首係洪武中王遜所作
記其生平行事甚詳

周易新講義十卷提要

宋龔原撰原字深甫遂昌人少與陸佃同師王安石進士高第元豐中爲國子直講官至寶文閣待制事蹟詳宋史本傳宋藝文志稱原著易傳十卷續解易義十七卷朱彞尊經義考則云未見東都事略偁原著有易傳春秋解論語孟子解各十卷并載有鄒浩一序按所云易傳疑卽是書晁氏讀書志云宋王安石三經義當時俱頒學宮獨易解以爲少作未善不專以取士故紹聖後又有龔原本耿南仲註易並行場屋考之宋楊時之說曰龔原本王學一派其人其書

似無足取惟宋時古笈傳世絕少而此書完善猶存
李衡義海撮要李簡學易記趙汝梅筮宗多取其說
且耿南仲書已收

四庫茲編續出亦未可偏廢矣

通紀七卷續五卷提要

唐馬總撰總有意林

四庫全書已著錄史傳總篤學雖吏事倥偬書不去
前所著有年麻通麻行於世此書起自太古訖于隋
季共十卷中間麻代之事粗陳其槩展帙瞭然後荆
南孫光憲者復輯全唐洎五代事蹟十卷以續總所

紀率多未寔今自十一卷唐高祖起閩王審知止係
孫氏所續然宋時卽僅存其五卷矣晁氏讀書志云
總書纂太古十七氏中古五帝三王及刪取秦漢至
隋世紀興滅又取虞世南略論分系于末今書中自
四卷至十卷有公子曰先生曰者當卽世南之略論
也惜前三卷已闕無從補錄王海所偁齊推序更無
可考矣蓋總以史籍繁蕪故上索典墳迄于隋季以
簡暢之筆成茲一編事簡而明辭約而該亦讀史者
所不廢也

諸葛武侯傳一卷提要

宋張栻撰栻有南軒易傳

四庫全書已著錄此傳不載南軒文集乃從宋刊單行本影寫其闡發武侯生平考證極確自陳壽作三國志尊魏斥蜀使後世莫明正僞且言武侯志大而短于用司馬光作通鑑朱子作綱目乃正其非栻更摭拾舊聞成此一卷具明才學過于管樂稱其有正大之體且傳中述前後出師表與今所傳字句間有異同其後跋云徵自文獻不敢存疑則其所見詳明必有古書足據矣

離騷集傳一卷提要

宋錢果之撰果之晉陵人所註離騷集傳一卷見宋史藝文志楚辭類果之以爲古詩有節有章賦則有節無章乃分離騷三百七十三句爲十四節其名爲集傳者以王叔師曾有離騷注解果之不敢同于王註也然其註旁採爾雅本草淮南子山海經等書其旨一稟於叔師惟不解昭明置騷於詩後之意遂認騷爲賦未免隅見錢曾讀書敏求記中稱之如此此冊借宋板影抄得之

策要六卷提要

元梁寅撰寅有周易叅議

四庫全書已著錄其門人黎卓序其文集云尙有方策稽要曾鋟梓行世卽此書也寅于諸經皆有訓釋史學亦頗考究是書元元本本能撮其要領宜爲學者所重耳

慎齋集四卷提要

明蔣主忠撰按主忠字存恕儀真人與兄主孝皆以詩名時稱景泰十才子者主忠其一也是集共四卷詞旨清逸致爲可誦考之朱彝尊所著明詩綜曾錄其芙蓉一絕句而此編古今各體計得二百八十餘首已爲全稿無疑矣

詩義指南一卷提要

宋段昌武撰昌武字子武廬陵人官朝奉郎是編諸家目錄均未收錄惟見朱彝尊經義考昌武又有叢桂毛詩集解讀詩總說二書此冊彝尊謂爲舉業發題而作自關雎以至鳲鷺或取詩中一章一節發其義語簡而深義約而盡自篤公劉以下惜未之及耳
增廣鐘鼎篆韻七卷提要

元揚鉤撰鉤字信文臨江人政和中王楚始作鐘鼎篆韻薛尚功已重廣之鉤又博采金石奇古之蹟益以奉符黨氏韻增補兩家所未備其篆則夏商周秦

之篆而以象形奇字終之自彫戈鉤帶以及碑刻古篆莫不畢載馮子政序稱三代禮樂之古文奇字盡在是矣洵不誣也又云自唐開元時以隸楷易漢本尚書而學者自此不識古文是書參訂博采使古文奇字列列在目可與薛氏書輔翼而行卷未有洪熙侯書籍印蓋明時本也

王峯志三卷王峰續志一卷提要

宋凌萬頃邊實同撰萬頃字叔度景定三年進士本陽羨人因其父壻於崑山顏氏因家焉邊實陳畱人其高祖始遷崑山詳前志邊淳德傳而續志又復爲

自序一篇誇其家世至峰本崑山地宋南渡時始析爲縣卽今之嘉定是也志中所載沿革風俗以及人物古蹟甚悉宋元時崑山志乘世不多得是冊足備一方之文獻也

長春子遊記二卷提要

元李志常撰是編志常記其師邱處機西遊事蹟孫錫序云凡山川道里之險易水土風氣之差殊與夫衣服飲食百果草木禽蟲之別靡不畢載卷末附錄則載當時詔勅等篇處機字通密又號長春子棲霞人自幼住蟠溪龍門者十有三年金大定時曾自終

南召令赴闕賜以巾冠待詔天長觀後放還山及元
太祖時常召至雪山之陽眷渥倍至後復居燕之天
長觀年八十餘著有磻溪集六卷此冊所載足資考
證卽處機各詩亦清真平淡多可誦云

軒轅黃帝傳一卷提要

不著撰人名氏見錢曾讀書敏求記傳記類曾于是
編之前載有廣黃帝本行記一卷亦無著書人姓氏
案注中引劉恕外紀蜀檮杌等書蜀檮杌爲張唐英
所著則此卷當是南宋人手筆書中備載黃帝顚末
及其子孫唐虞三代相承世數甚悉可補皇王大紀

之闕

養正圖解全卷提要

明焦竑撰竑有易筌

四庫全書己著錄是編見黃虞稷千頃堂書目萬厤
間竑以修撰爲皇子講官編此進之書中備採前言
往行可爲則倣者繪之於圖而詳爲之說卷首有竑
自序及祝世祿序稱此書繪圖爲丁雲鵬書解爲吳
繼序並一時知名之士也

尉繚子

尉繚子直解五卷提要

四庫全書已著錄直解明劉寅撰寅所撰書皆名直
解凡六種見林泉筆記此則六書中之一耳每篇下
各有小序發明其義注中所論多精審處如注威戰
篇妙勝之論云卽孫子所謂未戰而妙算勝者得算
多也于受命之論云卽太公論立將之義于踰垠之
論云卽太公所謂越江河渡溝塹之義寅以兵家言
注兵書猶儒者之以經注經也惟于天官篇刑德之
說而不用淮南子天文訓凡用太陰左前刑右背德
及兵略訓注刑謂十二辰德十日之語又將理篇云
壻父曰婚女父曰姻而不引爾雅壻之父爲姻婦之

父爲婚未足爲據然瑕瑜不相掩也

關尹子言外經旨三卷提要

關尹子

四庫全書已著錄言外經旨宋陳顯微撰同時王夷
鋟而傳之者顯微序云關尹一書莊列不能言文程
不能道其言簡其義詳似爲道德經作傳案是編分
上中下三卷自一字以至九藥莫不詳注而發明之
王夷所謂因言悉旨轉語明經設喻以彰元反辭而
顯奧或指意于言前或顯微於意外也尹喜書本屬
依託之冊然在僞書中頗有理致顯微經旨吐屬亦

復淵雅可謂質有其文

爲政善報十卷提要

宋葉畱撰畱字景良括蒼人是編見浙江通志本傳
凡十卷此其前編也其書採取經史各說以及當時
宦蹟錄其功在生民慶畱後裔者以成一編意取於
官師相規以爲有位者勸用意忠厚考證精詳殊不
多見同時陳相爲注其出處此從元人刻本過錄惜
後編已佚之矣

東漢文鑑二十卷提要

宋陳鑑編鑑建安人自稱石壁野人殆南宋遺民歟

是編自光武迄獻帝凡九朝大半采從本傳共得文二百三十餘篇宋史藝文志不載惟明人百川書志千頃堂書目絳雲樓書目並載有宋陳鑑西漢文鑑東漢文鑑而東漢文鑑誤作十九卷又天一閣書目亦載此書乃明刻本此從宋巾箱冊錄之以存一代之藝文焉

道德經論兵要義四卷提要

二冊

唐王真撰案真此書獨取道德經所論兵戰之要摭拾元微本上下二卷後更分爲四卷與鄭樵通志所載卷數合元和間進之于朝唐憲宗嘗手詔褒美之

具載篇首老子道德經五千言備舉大道至德修身
理國之要數十章後乃言及于用兵其旨微其言博
自河上公爲之訓釋後若嚴氏指歸開元注釋固已
發蘊指微而真所著要義獨于論兵之法經悉言之
夫真以朝議郎出領漢州軍事久列戎行而考其談
兵意指顧深求乎老子之說唐人之書不多是宜錄
也

遺山樂府五卷提要

金元好問撰好問有續夷堅志
四庫全書已著錄伏讀

御定歷代詩餘載詞人姓氏云遺山樂府錢唐凌雲
翰編輯是編從舊鈔本依樣過錄無雲翰姓氏疑轉
寫者誤脫耳案錦機集云僧李菩薩灑酒作花開牡
丹二株遺山爲賦滿庭芳傳誦一時是作今載集中
張爻偁其詞深于用事精于鍊句風流蘊藉不減周
秦合觀諸作良非虛美也

招捕總錄一卷提要

不著撰人名氏是編藏書家未著錄蓋佚已久矣此
從舊鈔依樣影寫所記元代招捕事宜起于世祖至
元迄于英宗至治案卷末云招捕不止此是惟取其

人名地名及事與序相干者入注中分二十九種其事多不見於正史而寔有關於正史雖篇帙無多而敘述典核彌足爲信是亦罕覲之秘笈矣

詩義集說四卷提要

明孫鼎撰。鼎字宜鉉，廬陵人。永樂中領鄉薦，任松江教授，擢監察御史，提督南畿學政。是編凡四卷，蓋采取解頤指要、發揮矜式等書，擇其新義彙爲一編，仍分總論章旨、節旨各類，展帙釐然，頗屬精備。其中所引如彭奇詩經主意、曹居貞詩義、發揮朱彝尊則云未見謝升孫詩經斷法，則云已佚。考之黃虞稷千頃

堂書目知是書成於正統十二年經義考曾列此書而注云未見此則從原刻影鈔惜其序文已佚耳

唐陸宣公奏議註十五卷提要

唐陸贊撰贊有翰苑集

四庫全書已著錄是編惟有奏議宋郎煜注煜事蹟無考卷首載經進奏議表銜題迪功郎紹興府嵊縣主簿煜又註東坡文集事畧題銜與此相同此編所註惟採經史爲多無泛搜博引之失不特選擇得當節錄亦多精審使讀者易見端倪茲從元至正甲午翠巖精舍重刊宋本影寫亦讀史者所不廢也

雲間志三卷提要

宋楊潛撰見宋史藝文志按雲間卽今江南之華亭縣在宋時兼今松江全郡之地此志體例繁簡得中不讓宋人會稽新安諸志書成于紹熙四年而知縣題名載至淳祐八年而止則張穎以下三十人是後人所續又進士題名載至寶祐元年姚勉榜錢拱之而止則慶元五年趙汝詒以下二十四人亦後人續八也又載樓鑰等記並爲後人所增考之元徐碩至元嘉禾志華亭一縣全取是書中語知潛此志爲當時所重矣

司馬法直解一卷提要

明劉寅撰寅有三略直解

四庫全書已著錄寅作直解共六種見張綸林泉筆記司馬法亦六書中之一也寅自序云是書言辭古簡而義深中間又有闕文誤字儒家多不經意學者由是不得其說今姑爲之直解其言非無所見而又能不妄改古書舊字如仁本篇會之以發禁者九註云發當作法卽周禮大司馬九伐之法也定爵篇變嫌推疑註云變當作辨辨別人之所嫌也又是謂兩之註云之當作支謂兩相支持之道用衆篇因其不

避註云避當作備因其不備卽所謂乘其無備也又
註仁本篇正不獲意則權云正者萬世之常權者一
時之用湯武仁義之兵而濟之以權者尤爲切實近
理之言矣

楊氏算法三卷提要

宋楊輝撰錢塘人是書成於德祐間分田畝比類乘
除捷法及算法通變本末爲上卷乘除通變算法爲
中卷算法取用本末爲下卷末附續古摘奇於古算
經若五曹張邱建諸家多疏通而證明之如張邱建
云不患乘除爲難而患分子母爲難則云分子母有

二本不爲難較其多寡者則用課分均不齊之數者
則用平分斤連銖兩匹帶尺寸非乘分除分不能治
之又於五曹算經亦多正其誤答之處與秦九韶數
學九章並爲習算術者之所宜究心者也

松窗百說一卷提要

宋李季可撰季可永嘉人摭拾古今事實而各爲論
說凡百條王十朋極稱賞之謂其有益風教比於唐
之杜牧紹興年間尹大任爲之付梓攷之志乘及各
藏書家均未著錄書中直書所見以采摭經史爲文
據正排異爲意同時如葉謙曾幾趙居廣諸人均有

題跋此從舊鈔影寫

續墨客揮犀十卷提要

宋彭乘撰乘有墨客揮犀十卷

四庫全書已著錄此其續編也宋陳振孫書錄解題則前續二編俱載共二十卷而不著撰人姓氏明商維濬刻稗海題彭乘之作蓋以書中所自稱名爲據卷中所載軼事遺聞以及詩話文評徵引頗爲詳洽足補前編之所未備其所議論多推重蘇黃亦與前集相同合之以爲完書

陶靖節詩註四卷提要

宋湯漢撰漢字伯紀鄱陽人淳祐間充史館校書官至端明殿學士謚文清人品爲真德秀所重事蹟具宋史本傳淵明詩文高妙學者未易窺測漢乃反覆研究如述酒之作讀者幾不省爲何語漢云窺見其指詳加箋釋以及他篇有宜發明者亦併著之清言微旨抉出無遺馬端臨文獻通考以爲淵明異代之知已其所稱說多與世本不同如擬古詩聞有田子泰句魏志作泰今本多僞爲田子春惟此與魏志無異其他佳處尤不勝指此從宋槩影寫誠秘笈也

貞一齋詩文彙二卷提要

元朱思本撰思本字本初豫章臨川人常學道于龍虎山中貞一其號云顧嗣立元詩四集稱思本嘗從吳全節居都下博洽文雅見稱於時所著詩文稿世無刻本僅存范樟劉有慶歐陽應丙虞集柳貫及全節六序俱諸人手書藏吳中劉損抑夫家此本乃叢書堂吳寬手鈔凡二卷上卷爲雜著文下卷則古近各體詩思本好學遠遊遍歷名山大川幾半天下嘗以昔人所刻禹迹圖混六合郡邑圖皆有乖謬乃參閱郡縣九域一統等志攷訂古今校量遠近成輿地圖一書計里開方之法至思本而始備今文稿內

有輿地圖自序一篇可証也大約思本之學地理爲長也

輿地紀勝二百卷提要

宋王象之撰

四庫未著錄惟有輿地碑記四卷云象之金華人嘗知江寧縣所著有輿地紀勝二百卷今未見傳本此卽其中之四卷今于江南得影宋抄本二百卷前有象之自序象之東陽人略云余披括天下地理之書參訂會粹每郡自爲一編以郡之因革見之編首而諸邑次之以及山川人物詩章文翰皆附見焉東南

十六路則倣范蔚宗郡國志條例以在所爲首而西北諸郡亦次第編集今考其成書之年在南宋嘉定十四年故其所指在所以臨安府爲首而一切沿革亦準是時又宮闕殿門壽康宮下引朝野雜記云寧宗始受禪云云則是作序在嘉定全書之成又在理宗時矣是書自卷一行在所起至劍門軍訖共府廿五軍卅四州一百零六監一并府軍州監一百六十六內或有一府一軍而分爲上下二卷故與總數不合其卷數全闕者自十三至十六又自五十至五十四又自一百卅六至一百四十四又自一百六十八

至一百七十三又自一百九十三至二百共闕三十
一卷至其餘各卷內之有闕葉又皆注明于目錄卷
數之下